

DOMINGU IV TEMPU KOMÚN – TINAN B

TEMA

Liturjia Domingu IV Tempu Komún nian garante ita katak Maromak la tuir ita-nia projeto sira egoízmu no mate nian ne’ebé halo mundu nia oinaat no halo ema sai atan no afirma katak Nia hetan forma sira atu bá hasoru nia oan sira atu propoin ba sira projeto ida liberdade no moris nakonu nian.

Lietura dahuluk propoin mai ita – ho figura Moisés nian – reflesaun ida kona-ba esperiénsia profética. Profeta mak ema ida Maromak hili, Maromak bolu no haruka atu sai ninia “liafuan” moris iha ema sira nia leet. Liuhusi profeta sira, Maromak bá hasoru ema sira no apresenta ba sira ninia proposta sira.

Evanjellu hatudu oinsá Jezús, Maromak nia Oan, hodi kumpre projeto libertadór Aman nian, liuhusi ninia Liafuan no hahalok, hafoun no nakfilak ba ema livre, sira hotu ne’ebé sai dadur egoízmu, salan no mate nian.

Leitura daruak konvida fiar-na’in sira atu hanoin sira-nia prioridade sira no la husik atu realidade tranzitória sira impede sira ba kompromisu loos servisu nian ba Maromak no maunalin sira.

LEITURA I – Deut 18,15-20

Livru Deuteronomio nian mak “livru Lei nian” eh “livru Aliansa nian” ne’ebé deskobre iha Templa Jerusalém iha tinan da-18 Josias nia ukun nian (622 mK) (kf. 2 Re 22). Iha livru ne’e, teólogo deuteronomista – orijináriu Norte (Israel) nian maibé, subar an iha Sul (Judá) depoizde liurai sira norte lakon funu hasoru Assíria – apresenta dadu fundamental sira-nia teoloxia nian: iha Maromak ida de’it, ne’ebé Povu tomak tenke adora iha fatin ida mesak kultu nian (Jerusalém); Maromak ne’e hadomi no hili Israel no halo ho nia aliansa rohan-laek ida; no Maromak nia Povu tenkésér Povu ida mesak, Jahwéh nia propriedade pesoál (tanba ne’e, la iha liu sentidu kestaun istórika hotu ne’ebé lori Maromak nia Povu ba divizaun política no relijoza, liutiha liurai Salomão nia mate). Finalidade fundamental katekista deuteronomista sira nian mak lori Maromak nia Povu ba kompromisu firme no ezjiente ho Maromak nia Lei, haklaken iha Sinai. Konvite firme ba Maromak nia Povu atu hakohak Aliansa ho Jahwéh no moris iha fidelidade ba kompromisu sira assume ona.

Livru (pontudevista literáriu) apresenta diskursu tolu Moisés nian, hato’o iha rai-tetuk Moab nian. Sente katak nia mate besik daudaun, Moisés husik ba Povu buat rumahanesan “testamentu espirituál”: nia fó hanoin ba ebreu sira kompromisu sira ho Maromak no konvida sira atu hafoun aliansa ho Jahwéh.

Testu ne’ebé ohin propoin mai ita mak parte ida diskursu daruak Moisés nian (kf. Dt 4,44-28,68). Testu ne’e integra konjuntu lejislativu ida kona-ba estrutura governu Maromak nia Povu nian (kf. Dt 16,18-18,22). Iha konkretu, ita-nia testu refere ba profetizmu nia papél no signifikadu.

Fenómenu profético la’ós eskluzivu Israel nian, maibé fenómenu ida ne’ebé koñesidu iha Canaan. Esperiénsia profética oioin ne’ebé mosu iha rai Canaan ho modalidade oioin hanesan matan-dook, haklalak ho dansa, éstaze...obriga atu tau problema dixernimentu nian entre

profesia ne'ebé loos no profesia ne'ebé laloos/falsa... Saida mak karakteriza profeta loos? Bainhira mak profeta ida ko'alia loos duni, iha Maromak nia naran? Problema ne'e mosu maka'as ho modu partikulár iha Reinu Norte nian, iha Acab no Jezabel nia tempu (874-853 mK), bainhira profeta sira Baal nian domina. Tradisaun sira kona-ba profeta Elias (kf. 1 Re 17-2 Re 13,21) trasa kuadru konfrontu loroloron nian entre profesia loos no profesia laloos. Katekista deuteronomista refere ba kestaun ida-ne'e, hodi apresenta iha-ne'e, kuadru profeta loos nian, nune'e oferese ba nia povu kritériu sira atu distinge entre profeta loos no profeta laloos.

MENSAJEN

Ba teólogu deuteronomista sira, Moisés mak exemplu no modelu profeta loos nian. Katak sá? Uluknanai, hakarak dehan katak, Maromak mak iha orijen no sentru vokasaun Moisés nian. La'ós Moisés mak kandidata an ba misaun profética, hodi nia insiativa rasik; la'ós Moisés mak hodi ninia hahalok eh kualidade sira manán “direitu” atu sai “profeta”. Iniciativa Maromak nian ne'ebé, ho forma gratuita, hili nia no haruka nia iha misaun. Se Moisés sai sinál Jahwéh nian, ne'e tanba Maromak rasik mak hakarak. Konsagrashaun “profeta” nian mai husi asaun gratuita Maromak nian, tuir kritériu sira ne'ebé dala barak la tuir ema nia lójika, hili ema konkretu ida, ho ninia kualidade no defeitu sira no haruka ba ninia maun-alin sira. Daruak, Moisés nafatin ko'alia sai no fó sasin liafuan sira ne'ebé Maromak tau iha nia ibun no fó orden ba nia atu haktuir. Mensajen ne'ebé nia hatutan la'ós Moisés nian, maibé Maromak nian. Profeta loos, la'ós ida-ne'ebé tranzmite mensajen pesoál ida, eh dehan buat ne'ebé ema sira gosta rona; profeta loos mak ida-ne'ebé, ho korajen no frontalidade, fó sai fielmente Maromak nia proposta sira ba ema no ba mundu.

Tanba profeta nia liafuan mak Maromak nia liafuan, presiza rona no simu didi'ak. Maromak rasik sei husu konta ba sira ne'ebé taka tilun no fuan ba Maromak nia dezafiu sira, ne'ebé Nia hato'o liuhusi profeta.

LEITURA II – 1 Cor 7, 32-35

Komunidade sarani Corinto nian mak komunidade ida tipikaemte grega, ho abut iha kultura-ambiente ida marka ho kontradiisaun boboot. Eskola filozófika oioin ne'ebé eziste iha sidade (no iha mundu gregu tomak) soi perspetiva diferente kona-na sentidu moris nian no kona-ba oinsá to'o ba ksolok no realizaun nakonu. Proposta sira dalan nian ne'ebé eskola sira-ne'e oferese dalabarak kontráriu malu...

Setór ida iha-ne'ebé nota maka'as nu'udar xoke entre fiar sarani no kultura elénika mak kestaun sira étika seksuál nian. Iha ámbitu ida-ne'e, kultura Corinto nian nakdoko iha estremu rua: husi sorin ida, laxizmu (la kontrola an, hanesan baibain akontese iha sidade marítima ida, iha-ne'ebé to'o mariñeiru sira husi mundu tomak no iha-ne'ebé ukun Afrodite, maromak-feto domin nian Grécia nian); husi sorin seluk, desprezu absolutu ba seksualidade (típiku tendénsia filozófika rumá nian ne'ebé hetan influénsia husi filozofia platónika, ne'ebé konsidera matéria nu'udar buataat no halo hahalok la kabé nian nu'udar ideál absolutu).

Paulo nia hakaran mak apresenta dalan ida ne'ebé iha ekuilíbriu: kondenaun ba forma hotu dezorden seksuál hotu, defeza valór kazamentu nian, eloju/hahí selibatu (kf. 1 Cor 7).

Provavelmente, sarani sira Corinto nian konsulta Paulo kona-ba dalan ne'ebé di'ak liu atu tuir – kazamentu eh selibatu. Paulo hatán ba kestaun ne'e iha kapítulu 7 Surat Dahuluk ba Corinto oan sira. Paulo konsidera katak kona-ba buat ne'e, nia la simu “ukun-fuan ida husi Na'i”; maibé ninia hanoin mak ema ne'ebé la kompromete an ho kazamentu kontinua nune'e no ema ne'ebé kompromete an keta “hakotu uniaun” (1 Cor 7,25-28).

MENSAJEN

Paulo rekoñese katak, ema ne'ebé la kabén iha tempu barak liu no disponibilidade atu preokupa "ho Na'i nia sasán sira" (vers. 32b) no atu haksolok Na'i. Ema ne'ebé kabén tenke atende família nia nesesidade sira no fahe ninia atensaun ba realidade oioin liga ho moris loroloron nian; ema ne'ebé la kabén bele hatán ba Maromak nia dezafiu sira no gasta nia moris atu serví Maromak nia projetu lahó kondisionalizmu eh limitasaun ruma.

Ida ne'e la dehan katak Paulo desvaloriza vida kabe-na'in nian no seksualidade no evita kabén no hadook an husi Maromak. Ba Paulo, kazamentu mak realidade importante ida (nia konsidera katak kazamentu no selibatu mak don Maromak nian – kf. 1 Cor 7,7); maibé realidade rai nian ne'ebé liu, tanba ne'e, labele absolutiza. Paulo nunka dehan katak kazamentu mak realidade aat ida eh dalan ne'ebé tenke evita; maibé evidente, iha ninia liafuan sira, predilesaun ba selibatu... Iha ninia perspetiva, selibatu fó vantajen nu'udar dalan ne'ebé hatudu ba realidade rohan-laek: haklaken moris foun resurreisaun nian ne'ebé hein ita, tempu hanesan fasilita servisu efikás ba Maromak no maun-alin sira (kf. 1 Cor 7,32-38).

Paulo nia liafuan vale ba tempu no fatin hotu; maibé nia iha lójika se ita tau iha neon katak komunitade dahuluk sira moris ambiente eskatolójiku. Ba sarani sira ne'ebé Paulo dedika Surat Dahuluk, ba sarani sira Corinto nian, Jezús nia mai ba dala rua besik ona: tanba ne'e presiza relativiza realidade tranzitória no liu lalais sira, no entre sira-ne'e mak kazamentu.

EVANJELLU – Mc 1, 21-28

Parte dahuluk Evanjellu nu'udar Marcos haktuir (kf. Mc 1,14-8,30) nia objetivu fundamental mak deskoberta Jezús nian nu'udar Mesias ne'ebé haklaken Maromak nia Reinu. Ho ninia katekeze, Marcos konvida lee-na'in sira Evanjellu nian atu akompaña Jezús nia revelasaun, atu rona Ninja liafuan no anúnsiu sira, atu sai dixípulu sira ne'ebé adere ba ninia proposta salvasaun nian. Deskoberta Mesias nian ne'ebé katekista Marcos propoin remata iha Mc 8,29-30, ho konfisaun mesiánika Pedro nian, iha Cesareia Filipe nian: "Ó mak Mesias".

Testu ne'ebé ohin propoin mai ita mosu, iha dalan nia hahú, dalan enkontru nian ho Mesias no ho NIinia anúnsiu salvasaun nian. Ho dixípulu dahuluk sira hale'u Nia, Jezús hahú revela An nu'udar Mesias-libertadór, ne'ebé hela iha ema nia leet atu apresenta ba sira proposta ida salvasaun nian.

Ita iha Cafarnaum (iha ebraiku Kfar Nahum, "aldeia Naum nian"), sidade ida iha Lago Kineret (Tasi Galileia) nia noroeste. Tuir Evanjellu sinóptiku sira, iha-ne'ebá mak Jezús sei hela durante ninia ministériu iha Galileia. Dixípulu ruma – Simão no nia alin André, Tiago, Zebedeu nia oan, no nia alin João – moris iha Cafarnaum.

MENSAJEN

Loron ne'e loron sábadu ida. Komunidade halibur iha sinagoga Cafarnaum nian ba liturjia sinagogál. Jezús, ne'ebé foin to'o iha sidade, tama iha sinagoga – hanesan judeu di'ak hotu – atu partisipa iha liturjia sabática. Selebrasaun komunitária hahú, normalmente, ho "profisaun fé nian" (kf. Dt 6,4-9), tuir ho orasaun sira, knananuk no leitura rua (ida husi Torah no ida fali husi Profeta sira); hafoin, mai komentáriu ba leitura sira no bensan sira. Karik Jezús simu konvite, iha loron ne'e, atu komenta leitura sira. Nia halo ho forma orijinal, diferente husi komentáriu sira ne'ebé ema toman ona rona husi "eskriba sira" (estuda-na'in sira Eskritura nian). Ema sira hakfodak ho Jezús nia liafuan sira, "basá Nia hanorin ho autoridade no la'ós hanesan eskriba sira" (vers. 22). Referénsia ba autoridade ne'ebé Jezús nia liafuan iha, hakarak dehan katak Nia mai husi Maromak no lori proposta ida ho marka Maromak nian.

“Autoridade” ne’ebé hatudu iha Jezús nia liafuan sira manifesta mós iha asaun koncreta sira. Hotu tiha Jezús nia liafuan sira ne’ebé hatudu Maromak nia prezensa, mosu “mane ida ho espíritu foer”. Judeu sira konvensidu katak moras hotu mai husi “espírituaat” ne’ebé tama iha ema no halo dadur sira. Ema sira ne’ebé moras kona sira la kumpre Lei (norma loos sira kona-ba konvivénsia sosiál no relijoza) no hela iha situasaun “impureza” nian – katak, dook husi Maromak no husi komunidade. Iha perspetiva ema sira Jezús nia tempu nian, “espírituaat” sira ne’ebé hadook ema husi Maromak iha podér absolutu ida, ne’ebé ema sira labele, ho sira nia kbiit-laek, manán nia. Sira fiar katak Maromak de’it, ho nia kbiit no autoridade absolutu, bele manán “espírituaat sira” no fó hikas moris no liberdade ba ema.

Marcos hatudu oinsá “espírituaat” ne’ebé domina “ema” ida prezente iha sinagoga interpela Jezús ho forsa. Proposta libertadora ne’ebé Jezús mai apresenta, iha Maromak nia naran, halo atu “espírituaat sira” responsavel ba kadeia sira ne’ebé hanehan ema, sai la hakmatek, basá sira sente katak sira-nia podér hasoru umanidade to’o ona rohan. Jezús nia asaun atu kura ema “ho espíritu foer” sai prova katak Jezús lori proposta ida libertasaun nian ne’ebé mai husi Maromak; liuhusi Jezús nia asaun, Maromak bá hasoru ema atu salva nia husi buat hotu ne’ebé impede atu hetan moris naresin.

Ba Marcos, epizódiu dahuluk ne’e hanesan apresentasaun programa asaun nian: Jezús bá hasoru ema sira atu liberta sira husi buat hotu ne’ebé halo sira sai atan no na’ok moris husi sira. Libertasaun ne’ebé Maromak oferece ba umanidade akontese daudaun. “Maromak nia Reiu” harii ona iha mundu. Jezús, hodi kumpre Maromak nia projetu libertadór, liuhusi nia Liafuan no asaun, hafoun no nakfilak iha ema livre, sira hotu ne’ebé moris dadur iha egoízmu, salan no mate nia laran.